

آرٹیفیشل انٹیلیجنس، ازرائیل ء اے آئی تاکت ء ڈیجیٹل اہد ء تہ ء ازرائیل ء کارکنگ ء ترز کار

### باور بلوچ

آرٹیفیشل انٹیلیجنس نہ تھنا یک پڑے بلکیں زانتکارانی گشگ انت کہ اے آئی وتی تہ ء وت یک آشوب ء اہدے زانگ بیت۔ اے آئی ء اہد ء تہ ء زندگ بوہگ ء واستہ نہ تھنا اے آئی ء بارو ء زانگی انت بلکیں اے آئی ء سر ء انچیں دزرے بہ بیت کہ دُگنیا ء تیزیں گاماں گوں ہم گام بہ ہیں۔ انیگیں وهد ء دُگنیا ء گجام ہم استان امریکہ، روس، چین یا ازرائیل دُستانی جُهد ہمیش انت کہ آرٹیفیشل انٹیلیجنس ء تہ ء نوکیں سسٹم دیم ء بیار انت داں کہ آوانی تاکت گیش شاہگان بہ بیت۔ ہر استان اے آئی ء تہ ء دیمروی کنگ ء واستہ استان ء تہ ء ہستیں ٹیکنالوجوکل کمپنیاں سکین دنت ء میان اُستمانی چیلنجانی دیمپان بیت داں کہ کمپنیاں پہ کارکنگ ء ہج ڈولیں اڑاند دیم ء منیت ء اے آئی ء وسیلگ ء تاکت ء برجم داشت بہ کنت۔ 2023 نومبر ء ماہ ء امریکہ وت یک میان اُستمانی سیاسی مَنگ نامگے دیم ء کاریت کہ راجی پوج پہ زمہ واری ء شریں نیتاں آرٹیفیشل انٹیلیجنس ء پہ پوجی مکسداں کارمرز بہ کن انت۔ مَنگ نامگ ء تہ ء گشگ بیت کہ پوج آرٹیفیشل انٹیلیجنس ء انچیں داپے ء کارمرز بہ کنت داں کہ میان اُستمانی انسانی ہک پادمال کنگ مہ بنت، اے آئی پہ Ethical کاراں کارمرز بہ بیت، اے آئی انچو کارمرز کنگ بہ بیت داں کہ دگہ جیڑپہ پیدا کہ مہ بیت ء اے آئی انچو جوڑ کنگ بہ بیت داں کہ Biased مہ بیت۔ 2024 ء فروری ء ماہ ء مَنگ نامگ ء کساس پنجاہ مُلک دزرنڈ کنت بزاں تپاک دار انت۔ بلے امریکہ ء مستریں ہمکاراں چہ یگے ازرائیل اے مَنگ نامگ ء نہ مَنیت ء دزرنڈ نے نہ کنت۔ مرچیگیں زمانگ ء ازرائیل اے آئی لیڈر گشگ بیت ء اے آئی ء کارمرز کنگ ء گوں انچیں ٹیکنالوجی نے دیم ء اُورتگ کہ اے ٹیکنالوجی نہ تھنا میانی رودرتک ء تہ ء ازرائیل ء تاکتے جوڑ کن انت بلکیں سرجمیں دُگنیا ء ازرائیل ء تاکتے ء جہت ء منارین انت۔ فلسطین ء چُکچینی ء بارو ء سرجمیں دُگنیا سرپد انت بلے، فلسطین ء ہر رپورٹ اے پدَر کنت کہ فلسطین ء جیڑہ ء دگنیا سرپد نہ انت۔ ایشی ء مستریں سبباں چہ یکے ازرائیل ء کاونٹر انسرجنسی پالیسی ء آئی ء تہ ء اے آئی ء کارمرز انت۔ بیانیہ ء جوڑ کنگ بہ بیت، ٹارگٹ کلنگ بہ بیت، فلسطین ء تہ ء سرویلنس بہ بیت یا فلسطین ء سلاہ بندیں جہد ء نزور کنگ بہ بیت دُستیں نیمگ ء ازرائیل اے آئی سسٹم ء نوکیں ٹیکنالوجی کارمرز کنگ ء انت۔ مرچی بلوچ ہم یک جنگے ء دیمپان انت۔ یک نیمگے پاکستان انت کہ وتی تہ ء تاکتور ء دومی نیمگ ء بلوچ راجی جز انت کہ وت ء تاکتے جوڑ کنگ ء جُهد ء انت۔ بلوچ راج ء را لوٹیت کہ ہر ہما شے کہ تاکتے جوڑ کنگ ء گُمک کن انت، گڑا اُل شئیانی بارو ء آڑنا بہ بیت ء گیشاں گیش ہم نیمگ ء دلگوش ء گور بہ کنت۔ اے نبشتانک ء تہ ء ما جُهد کن این کہ اے آئی ء کسانیں پجارے بہ دیں ء اے چیز ء گیشیں این کہ اے آئی ازرائیل ء فلسطین ء جنگ ء میان ء چوں کارمرز بوتگ ء بلوچ اے آئی ء اہد ء گجا اُوشتاتگ۔

### ڈیجیٹل اہد ء آرٹیفیشل انٹیلیجنس

ڈیجیٹل اہد ء جند چوشکہ بازیں گالاں گوں پجار کنگ بیت ء دگنیا ہر روج گیشاں گیش اے نیمگ ء دلگوش دیاں ء سوبمند بوہان انت۔ انفارمیشن اہد، انٹرنیٹ، ڈیجیٹل اہد ء نیٹورک آپ نیٹورک وڑے نہ وڑے یکیں اہدے شون ء دینت ء ڈیجیٹل اہد ہم چو ایگریکلچر ء انڈسٹریل آشوب ء وڑے یک آشوبے۔ نوں جُست پشت کپیت کہ کُل دگنیا انوں ہمے اہد ء تہ ء زند گوازینگ ء انت؟

ہمک راج انیگیں اہد ء تہ ء ہمے پگر ء داریت کہ آئی ء گور ء گیشاں گیش انفارمیشن بہ بیت داں کہ آوتی راج ء ہستی ء برجہا بہ داریت۔ ہر راج ء را ڈیجیٹل اہد ء تہ ء زندگ بوہگ ء آرٹیفیشل انٹیلیجنس ء اہد ء تہ ء گام ایر کنگ ء واستہ اَلَم انت کہ وتی تہ ء وت آشوب بیاریت۔ ازرائیلی

بریگیڈیئر وٹی کتاب ۽ تہ ۽ گشتیت کہ ہر راج ۽ را پنچ اندری (انٹرنل) آشوبانی تہ ۽ گوزگی انت۔ نوں آ راج اے آئی اہد ۽ تہ ۽ اتک کنت۔ اولی اندری آشوب دگنیا ۽ تہ ۽ گیشاں گیش کمیونیکیشن ڈیوائسوں گوں گشادی ۽ کار گرگ انت۔ دومی (Data) ڈیٹا ۽ آشوب انت۔ اے آشوب ۽ آئیگ ۽ واستہ یک برے گوست ۽ بگر داں انوگیں روچانی ڈیٹا یکجاہ کنگی انت۔ سیمی آشوب پدا ہمے گلیں ڈیٹاہانی استور کنگ انت۔ بزاں انچیں ٹیکنالوجی کہ ۽ حساب ڈیٹا استور گت بہ کنت، چوشکہ Cloud انت۔ Cloud آنلائن ڈیٹا استوریج انت ۽ ہمد ۽ ڈیٹا زورگ ۽ دیم ۽ پروسس کنگ بنت۔ نہ تہنا ایشانی استور کنگ بلکیں ایشاں انچیں داپے ۽ ترتیب دیگ داں کہ اے ۽ حساب ڈیٹا یکیں وھد ۽ واستہ تیار بہ بنت بزاں اے ڈیٹا ڈیپ لرننگ پروسس ۽ تہ ۽ بہ گوز انت۔ چارمی آشوب ایش انت کہ ۽ حساب ڈیٹاہانی واستہ High Performance Computing ۽ بند ۽ بست کنگ۔ پنچمی آشوب آرٹیفیشل انٹیلیجنس ۽ جند انت۔

اے آئی کمپیوٹر سائنس ۽ پڑے، ایشی ۽ زور ایش انت کہ انچیں سسٹم جوڑ گت بہ کنت کہ آسٹم کساس انسان ۽ بودشتانی حساب ۽ کار بہ کنت۔ چوشکہ زبانانی بارو ۽ زانگ ۽ توجیل سازی۔ اے آئی ۽ چوناہا سے بھر انت۔ Super AI، General AI، ۽ Narrow AI۔ نیرو اے آئی آرٹیفیشل انٹیلیجنس ۽ بھرے، انچوش گش انت کہ اے دابیں اے آئی تہنا یک کارے کت کنت ۽ یکیں کار ۽ شریں ڈولے ۽ کت کنت۔ چوشیں اے آئی سسٹم دگہ ہج کار ۽ بودشت نہ دار انت، ہما کار ۽ واستہ جوڑ بوتگ انت تہنا ہما کار ۽ کت کن انت۔ چوش کہ آئی پون ۽ Siri ۽ ChatGPT انت۔ پہ درور اگ ChatGPT انسان ۽ ڈول ۽ جستانی پسو دیگ ۽ اکسانی جنریٹ کنگ ۽ واستہ جوڑ بوتگ گڑا آ Facial Recognition کت نہ کنت۔ پرچا آ انچو بودشت نہ داریت۔ دگنیا ۽ تہ ۽ انوگیں وھد ۽ ہر اے آئی ٹولے کارمرز بوھگ ۽ انت یا جسدی حساب ۽ ہست انت داں درست نیرو اے آئی سسٹم انت۔ تہنا نیرو اے آئی دگنیا ۽ تہا پریکٹیکلی ہست انت۔

دومی داب ۽ اے آئی جنرل اے آئی انت۔ اے داب ۽ اے آئی ٹول جیڑت کن انت، چیزاں ہیل کت کن انت ۽ جیڑھاں وٹی وڑ ۽ توجیل ہم کت کن انت۔ چوشیں اے آئی بس باوست ۽ لیکھانی تہ ۽ انت۔ اگاں چوشیں اے آئی سسٹم جوڑ بہ بیت گڑا آئی ۽ کار کنگ ۽ داب چوش بیت۔ آریاضی ہیل کت کنت، توجیل سازی کت کنت، وت جیڑت کنت یا ہر روچیگیں جاورانی تہ ۽ چیزاں وٹی تہ ۽ جاہ دات کنت۔ بزاں چوشیں اے آئی ٹول نہ تہنا یک کارے ۽ واستہ جوڑ بنت بلکیں جتا جتائیں کارانی واستہ جوڑ بنت۔ اے دابیں اے آئی انگت دگنیا ۽ تہ ۽ وجود نہ داریت۔ بازیں زانتکارانی گشگ انت کہ جنرل آرٹیفیشل انٹیلیجنس آؤکیں وھد ۽ اتک کنت ۽ ہر استان ۽ مزنیں ٹیکنالوجیکل کمپنیانی جھد ہمیش انت کہ اے داب ۽ اے آئی ۽ سر ۽ کار کت بہ کن انت۔

سوپر اے آئی سیمی داب انت۔ اے دابیں آرٹیفیشل انٹیلیجنس شریں شریں انسان ۽ زیناں چہ بودناکتر بنت۔ گشگ بیت کہ اے دابیں اے آئی سسٹم نہ تہنا بازیں کار کت کنت، بلکیں اے دابیں اے آئی سائنٹیفک شے شوہاز کت کنت ۽ ایشاں مارشت ۽ سیادی ۽ بودشت ہم مان بیت۔ بلے، سوپر آرٹیفیشل انٹیلیجنس تہنا دیدانک ۽ باوستانی تہ ۽ ہست انت۔ جسدی حساب ۽ ایشی ۽ ما دیست گت نہ کن این۔

اگاں سے این داب ۽ اے آئی آن آسانیں گالاں گوں تپاوت بہ کن این گڑا ما گشت کن این کہ نیرو اے آئی ایوک ۽ یک کارے کنگ ۽ بودشت داریت، جنرل اے آئی تقریباً انسان ۽ ذہنیت ۽ حساب ۽ کار کنگ ۽ بودشت داریت ۽ سوپر اے آئی انسان ۽ بودشت ۽ چہ گیشتر ۽ شرتر کار کنگ ۽ بودناکی داریت۔ اے آئی ۽ زانگ ۽ واستہ زلوری انت کہ اے آئی ۽ لہتیں شے ہست انت، ہمایانی بارو ۽ آژنا بوھگ الم انت:

- Machine Learning
- Machine Vision
- Generative AI

- Data Sets
- Deep Learning

اے لہتیں آنچیں شے آنت، وھدیے اے آئی ٹیکنالوجی ۽ بارو ۽ ہبر بیت داں اے گالانی نام الم گرگ بیت۔ دگنیا ۽ تہ ۽ گجام ہم اے آئی سسٹم بہ بیت گڑا مشین لرننگ آئی ۽ بُنکی کاراں چہ یک۔ مشین لرننگ مشین ۽ را ڈیٹا ۽ وسیلگ ۽ ہیل کنگ ۽ کُک کنت ۽ کمپیوٹر ۽ را ہما پیسلہ ۽ زورگ ۽ واستہ ہج دگہ پروگرام کنگ ۽ زلورت نہ انت۔ ایشی ۽ ہوار اگان جنریٹیو اے آئی ۽ سر ۽ باوست بہ بیت گڑا ChapGPT ۽ DeepSeek ۽ وڑیں اے آئی ایپ زین ۽ کاینت۔ جنریٹیو اے آئی ۽ تہ ۽ اکس، توار یا کہ تامرہند یک ردے ۽ بزاں prompt ۽ وسیلگ ۽ جنریٹ بیت۔ ChapGPT ۽ زوتاں وتی نوکیں اپڈیٹے دیم ۽ آورتگ کہ GPT 5 یا OpenAI ۽ نام ۽ زانگ بیت۔ ChatGPT ۽ سروک Sam Altan ۽ گشگ انت اے اپڈیٹ ۽ تہ ۽ انچیں ہودناکی ہست کہ اے وت سافٹ وئر جوڑ کت کنت۔ پرچا کہ OpenAI نوکیں اپڈیٹ ۽ تہ ۽ کمپیوٹر ۽ زبان کوڈنگ داں کسانیں گچے ۽ ہست انت۔ دیمتری شے مشین وژن انت۔ مشین وژن انچیں ٹیکنالوجی ہے، اے ٹیکنالوجی (Visual Information) بزاں اکس یا تامرہنداں پروسس گنت۔ ہمے مشین وژن چوشکہ Facial Recognition، ڈرون ۽ سرویلنس ۽ واستہ کارمرز بیت۔ ایشی ۽ ہوار ڈیٹا سٹ بزاں ہما ڈیٹا کہ مشین لرننگ ۽ کُک کنت، ہمے ڈیٹایاں اے آئی سسٹم ۽ تہ ۽ آنچیں داپے ۽ رد ۽ بند دیگ داں کہ ہما مکسد ۽ واستہ جوڑ بوتگ ہما مکسد ۽ حساب ۽ تجزیہ ۽ پیسلہ زُرت بہ کنت۔ ڈیٹا سٹانی وسیلگ ۽ اے آئی ایپ Biased ہم کنگ بنت۔ ازرائیلی بریگیڈیئر جنرل وتی کتاب The Human Machine Team ۽ تہ ۽ ڈیپ لرننگ ۽ چوش گشینیت کہ ڈیپ لرننگ ہما ٹیکنالوجی انت کہ انسان ۽ ہودناکیاں ٹریس کنت۔ آدمیترہ ہم گشیت کہ انسان ۽ دماگ ۽ اربانی حساب ۽ نیورون ہست ۽ اے نیورون یکے دومی ۽ گوں ہور انت ۽ نیٹورکے جوڑ کن انت۔ ہمے وڑ ۽ ڈیپ لرننگ ہم آرٹیفیشل نیورل نیٹورک جوڑ کنت۔ بریگیڈیئر ۽ رد ۽ آرٹیفیشل نیورل نیٹورک گیشترین تاکتے ۽ گوں کار کنت۔

### جُزانی میان ۽ اے آئی جنریٹڈ کنٹنٹ (Content)

روکپتی زانتکار Tom Bryder ۽ گشگ انت کہ آنچیں اکس ہست انت کہ یک نگاپے (Visual) ۽ گوں انسان ۽ سانمند گت کن انت۔ اگان چوشیں اکس پروپیگنڈہ ۽ واستہ کارمرز بہ بنت گڑا ٹوم بریٹڈر چوشیں اکساں Visual Propaganda Model ۽ نام دنت۔ پہ درور دومی جہانی جنگ ۽ نازی پارٹی انچیں پنتاک جوڑ کنت کہ آئی ۽ تہ ۽ بس یک Visual ہے ہست۔ بزاں یک پوجی ہے بے گس بوہگ ۽ انت ۽ چہ لوگ ۽ مردماں دور بوہگ ۽ انت۔ اے اکس نازی پارٹی ۽ دُژمن ۽ مورل ۽ دور دنت۔ بریٹڈر ۽ گشگ انت کہ ہما ہال کہ پیسر ۽ گشادی ۽ گوں لس مہلوک ۽ گورا شنگ بہ بیت گڑا ہما ہال گیش دلگوش دیگ بیت۔ ہیات بلوچ ۽ ژانگولیں لاش ۽ اکس اردیں رسانکدر ۽ گردش کنت داں الکاپی ۽ مہلوک ۽ باوست ۽ مٹ کنت۔ ایشی ۽ مستریں سوب ہمیش ات کہ ہیات ۽ وتسریں کوش ۽ کسہ تہنا یک اکسے ۽ تہ ۽ ات۔ یک Visual ہے ات کہ مہلوک ۽ دیم ۽ گشادی ۽ ایر کنگ بوت۔ وھد مٹ بوہان انت، ہمے داب ۽ ڈجیٹل اھد ۽ تہ ۽ Visual Propaganda Model ۽ تہ ۽ ہم مٹی گندگ ۽ کیت۔ اے آئی ٹولانی وسیلگ ۽ مروچاں Text to Image ۽ کُک ۽ کنٹنٹ جوڑ کنگ بیت۔ ہم میان ۽ مارا سرپد بوہگی انت کہ اے آئی ۽ کرد چے انت، اے آئی ۽ وسیلگ ۽ پروپگنڈہ چوں کنگ بیت ۽ اے آئی ٹول جنگانی میان ۽ چوں کارمرز کنگ بوہگ ۽ انت؟

اے آئی ٹولاں چہ جنریٹ کتگیں تامرہند، اکس یا نبشتانک مردمانی پگراں شریں ڈولے ۽ سانمند کت کن انت۔ مروچاں سک باز اے آئی ٹول ہست کہ Text To Image کنٹنٹ جنریٹ گت کن انت۔ پہ درور Canva, Midjourney, Adobe Stock, Leonardo AI ۽ دیگے بازیں ٹول ہست کہ کارمرز بوہگ ۽ انت، ایشانی تہ ۽ لہتیں Paid انت بزاں زُر ۽ سر ۽ انت ۽ لہتیں بے زر ۽ کارمرز بوت کن انت۔ ازرائیل ۽ فلسطین ۽ جنگ ۽ میان ۽ Adobe Stock ۽ کارمرزی گیش گندگ ۽ کیت۔

ہر نیمگ ء مارا ہمے ٹول کارمرز بوہگ ء گندگ ء کاینٹ۔ پہ درور فلسطینی جھدکار ہمے ٹول ء وسیلگ ء کنٹنٹ جوڑ کن آنت ء سرجمیں دُگنیا ء ہیال ء وتی نیمگ ء کش آنت۔ All Eyes On Rahfa یک اے آئی جنریٹڈ اکسے ء سر ء نویسگ بیت ء اکس ہمے پدر کنت کہ فلسطین ء مردم جنگ ء ے گس گتگ آنت۔ اکس ء Background ء سدانی کچ ء اوتاگ گندگ ء کیت ء اے اوتاگ ہمے پدر کن آنت کہ ازرائیل ء ٹوپاں فلسطینیانی گس سرجم ء ولگوچ کتگ آنت پمشکا نوں آ اوتاگاں بندگان ء مجبور آنت۔ انڈیا ء مزن نامیں ازمکار بہ بنت یا یورپ ء نشتگیں مردم اے اکس ء پروپیگیٹ کنگ ء ہوار بنت پرچا کہ اے اکس ء Visual سک سانمند بیت۔ اے اکس ء راکساس 46.6 ملین مردم شنگ کنت۔ ہمے میان ء ازرائیل ہم کاؤنٹر نیریٹیو ء ہمے ٹول ء جند ء کارمرز کنت۔ Where were your eyes on Oct 7th، اے اکس ء تہ ء حماس ء جنگولے ء را توپکے دست ء ء ازرائیلی گونڈو ے ء کڑا اوشاتگ۔

چوش ہم نہ انت کہ ہر اے آئی ٹول ہما prompt ء حساب ء کنٹنٹ جوڑ کنت۔ بلکین لہتیں انچیں اے آئی ہست کہ ہچر تئی لوٹیتگیں کنٹنٹ ء نہ دینت۔ بزاں کہ چوشیں اے آئی ٹولانی ڈیٹا سیٹ Biased آنت ء ہاسیں ایجنڈہ ء سر ء کنٹنٹ جوڑ گت نہ کن آنت۔ چوش باز براں فلسطین ء جُز ء تہ ء گندگ ء کیت کہ میٹا اے آئی ٹول فلسطین ء ایجنڈہ ء سر ء لوٹیتگیں مواد جنریٹ گت نہ کنت۔ میڈیا ء تہ ء اے آئی جنریٹڈ اکسانی سر ء پروپیگیشن ء را Synthetic Media ہم گش آنت۔

ہمے Synthetic Media مارا بلوچ جُز ء ہلاپ ء ہم گندگ ء کیت۔ پہ درور چمروک نامیں اکاؤنٹے ماں چاگردی رسانکدر ء گندگ ء کیت کہ بلوچ جُز ء بندوکیں نامی ئیں مردمانی تاُمراں جوڑ کنت ء پدا ہمے بلوچ جُز ء ہلاپ ء گپ کنگ ء گندگ ء کیت۔ زورگیریں پاکستان ء چوشیں کار پہ دماں زانگ بنت کہ اے آئی جنریٹڈ آنت۔ پرچا کہ ایشانی Visual ہمے ڈول ء انت بلے دومی نیمگ ء ہمے تاُمربندانی توار بند چٹ ء ہما مردم ء توار ء ڈول ء انت۔ چوشکہ بلوچ رہشون بشیر زیب ء ہیر بیار ء سر ء تاُمر جوڑ کنگ ء ہمے پیشدارگ بوتگ کہ آ بلوچی زبان ء ہبر کنگ ء انت ء بلوچ جُز ء ہلاپ ء ہبر کنگ پرماٹگ آنت۔ Synthetic Media ء سبب ء مرچی مردمانی سیاسی ء چاگردی ہیال مٹ کنگ بوہگ ء آنت۔ نوں جیڑہ اے پاد کیت کہ ہمیشانی سوب ء اسل اکس یا تاُمربند کجام آنت ء اے آئی جنریٹڈ اکس ء تاُمربند کجام آنت ایشانی تہ ء تپاوت کنگ سک گران بوہان انت۔

### اے آئی، Pegasus Spyware ء سرویلنس

اے آئی ء سر ء جوڑ گتگیں سرویلنس سسٹمانی جوڑ کنوک استانانی جند بنت یا استان چہ مزین کمپنیاں بھا زور آنت۔ کمپنی استان ء، بزاں مُلک ء تہ ء بوت کن آنت ء مُلک ء دُن ء ہم۔ استان پہ نوکیں ٹیکنالوجی ء جوڑ کنگ ء ہاتر ء وتی اندری (Domestic) کمپنیاں سکین دینت ء گُمک کن آنت کہ آنوکیں ٹیکنالوجی دیم ء بیار انت داں کہ استان پہ وتی دُزمنان Deterrence جوڑ گت بہ کن آنت ء کمپنی چہ نوکیں ٹیکنالوجیاں گیش زَر گمائینت بہ کن آنت۔ روس مروچی ڈرون وارفیئر ء تہ ء مزین تاکتے زانگ بیت ایشی ء مستریں سوب ہمے کمپنیانی سکین دیگ ء آہانی کارانی مہدود نہ کنگ انت۔ ازرائیلی بریگیڈیئر وتی کتاپے ء تہ ء گالے کارمرز کنت Innovation System Plus کہ اے آئی ٹیکنالوجی ء تہ ء جہانی تک ء وت ء منارینگ ء ہاتر ء ہمے ترزکار ء بُنیات ء کار کنگی انت۔ نبشتکارے ء گُشگ انت کہ درستیں ادارہاں یک مُشت بوہگ ء کار کنگی انت۔ اے آئی ٹیکنالوجی ء دیمروی کنگ ء واستہ سرکار، اندسٹری ء اکیڈمیاں ہور کار کنگی انت۔ سرکار کار کنگ ء ہاتر ء رازی بیت ء پہ کار کنگ ء ہچ دگہ سیمسر جوڑ نہ کنت۔ اندسٹری پہ زَر جنگ ء رِسک زوریت ء اکیڈمی بزاں وانگی ادارہ شوکیں ذہن ودی کن آنت ء نوکیں ٹیکنالوجی دیم ء کار انت۔ اے آئی اہد ء تہ ء ہر استان کساس ہمے داب ء کار کنگ ء گندگ ء کاینٹ ء اے آئی ء گُمک ء نوکیں اے آئی سسٹم جوڑ کنگ ء آنت۔ مرچی ہمے اے آئی سسٹمانی تہ ء یکے اے آئی سرویلنس سسٹم انت۔ اے سسٹم Facial Recognition، Social Media Algorithm، CCTV ء رسانکدر ء چیزاں مانیٹر کنت۔ ہستیں

زمانگ ۽ گيشتر مردمانی گور ۽ موبائل هست، آچاگردي رسانکدر ۽ جی میل ۽ وڙیں سافت وئیر کارمرز کن انت۔ ازرائیل ۽ وڙیں تاکت گوگل ۽ میٹا ۽ ڏولیں مزنیں ٺیک کمپنیاں چه Cloud Service بها زور انت ۽ وت چوشیں سسٽم جوڙ کن انت یا چوشیں سرویلنس سسٽم بها زور انت داں که فلسطین ۽ وڙیں ایردستیں راجانی میان ۽ وتی سرویلنس ۽ گیش مُهکم کُت به کن انت۔ پدا هِے اے آئی سرویلنس سسٽم دومی چیزے ۽ کنیکٹ هم بوت کن انت، په درور ڏرون، سی سی ٹی وی کیمره ۽ بائیو میٹرک ڏیٹا مشیناں۔ ازرائیل دگنیا ۽ ته ۽ سرویلنس ٺیکنالوجی ۽ رهبر گشگ بیت، ازرائیل وتی واسته چوشیں سسٽم جوڙ کنت ۽ دیم ۽ بها هم کنت۔ ازرائیل ۽ جوڙ کتگیں سرویلنس سسٽماں چه یک WolfPack انت۔ اے سسٽم ۽ ته ۽ فلسطینیانی سرجمیں ڏیٹا مان انت ۽ همیشی ۽ سر ۽ Facial Recognition کنت ۽ وتی سرویلنس ۽ مهکم کنت۔ ازرائیل ۽ چه چین ۽ کمپنی ۽ گور ۽ هم سرویلنس سسٽم بها زرتگ، چوشکه Hikivision سی سی ٹی وی کیمره انت۔ اے کیمره هاس چین ۽ ته ۽ ایردستیں ٺیک Uyghur آئی واسته جوڙ کتگیں سرویلنس سسٽم۔ همیشی ۽ ازرائیل بها زوریت ۽ فلسطین ۽ ته ۽ کارمرز کنت۔

ازرائیلی کمپنی NSO Group، Pegasus ۽ نام ۽ یک Spyware ۽ جوڙ کنت ۽ اے دگنیا ۽ ته ۽ ابکھی کارے بیت۔ پگسس ۽ جوڙ کنوک بزاں ین یس او گروپ یک ٺیکنالوجیکل کمپنی ۽ که Cyber Security ۽ انٺیلجنس ۽ سر ۽ کار کنت۔ پگسس ۽ کار کنگ ۽ داب انچش بیت که اگاں اے اسپائی وئیر ٺول موبائل ۽ انسٽال بوت گڙا موبائل ۽ کارمرز کنوک هچ پیم ۽ سرید نه بیت که چوشیں ٺولے آئی ۽ موبائل ۽ مان انت۔ ایشی ۽ انسٽال بوهگ ۽ رند هما victim ۽ هر سر ۽ پُر، آ چه کنگ ۽ انت، کجام ایپ ۽ سر ۽ چه چارگ ۽ انت ۽ چه گپ جنگ انت، اے ڏرستانی بارو ۽ هما Hacker سرید بیت۔ آهر چیز ۽ کارمرز به کنت گڙا هما انسٽال کنوک ۽ گور ۽ سر بیت۔ انسٽالیشن ۽ رند هما victim ۽ موبائل ۽ هر access بزاں مائیکروپون، کیمره ۽ ڏسپل ڏرست هما Hacker ۽ گور ۽ بنت۔

کساس 2016 ۽ کینڊا ۽ میان اُستمانی ریسرچ لیبارٽری که سیٽیزن لیب ۽ نام ۽ زانگ بیت پگسس اسپائی وئیر ۽ دگنیا ۽ دیم ۽ پدر کنت۔ الجزیره ۽ یک رپورٽر ۽ ”تھمر آممیسا“ وهڊے پگسس اسپائی وئیر ۽ آماچ بیت گڙا هِے میان ۽ سیٽیزن لیب لهٽیں ماه ۽ هما رپورٽر ۽ موبائل ۽ گون دلگوش ۽ گور کنت که کجام وڙ ۽ اے کار کنت ۽ چون جوڙ کنگ بوتگ۔ تھمر ۽ سر ۽ بندات ۽ یک لینک کیت ۽ هِے لینک ۽ دست جنگ ۽ گون موبائل ۽ access هما Hacker ۽ گور ۽ روت۔ بندات ۽ پگسس ۽ انسٽالیشن ۽ ترزداب چوش بوتگ که لینک موبائل ۽ میسج ۽ دروشم ۽ اتکگ ۽ هِے لینک کلک کنگ ۽ گون پگسس اکٺیو بوتگ۔ اگاں لینک کلک کنگ نه بوتگ گڙا پگسس انسٽال نه بوتگ۔ بلے، کساس 2017 ۽ 2018 ۽ میان ۽ ین یس او گروپ گیش کار کنت ۽ پگسس ۽ را یک انچیں داپ ۽ جوڙ کنت که ٺارگٹ ۽ کلک کنگ ۽ ابید هم پگسس انچو موبائل ۽ ته ۽ جاه کنت۔ اے ٺیکنیک ۽ را Zero Click Technique ۽ نام دیگ بوتگ۔ NSO group کمپنی ۽ گشگ انت که اے په هما هاسیں استاناں جوڙ کنگ بوتگ که آناشرکاری ۽ دیمپان انت ۽ اے ٺیکنیک استاناں ناشرکاری ۽ پروش دیگ ۽ کمک کنت۔

پگسس یک انچیں کوڙے ۽ چه جوڙ بوتگیں سسٽم که جنگ وڊی کت کنت۔ پگسس اے آئی ۽ چه جوڙ بوتگیں اُوزار ۽ نه انت بلے ایشی ۽ کارمرز کنگ ۽ گون اے آئی سسٽمانی ته ۽ انچیں ڏیٹا سٽ کنگ بیت که ڏڙمن ۽ شوهاز کنگ ۽ ارزانی بیت ۽ ازرائیل ۽ پگسس ۽ کمک ۽ چه انچیں اے آئی ٺول جوڙ کتگ که زوت ڏڙمن ۽ شوهاز کت کن انت۔ بازیں استان چوشکه هندوستان، سعودی عرب ۽ عرب امارات ۽ پگسس چه ین یس او گروپ ۽ گور ۽ بها هم زرتگ۔

## اے آئی ۽ جنگ ۽ آئومیشن

دگنیا ۽ دیمروی ۽ پڄی ۽ مرچی جنگ ۽ ترزکار، جنگ ۽ لوٹ ۽ جنگ ۽ ته ۽ کارمرز بؤکیں سِلاه هم بدل بوهان ۽ پیداک انت۔ مرچیگیں ڏیجیٺل اهد ۽ میان ۽ گلاں چه گیش تاوان دیوکیں سِلاه

انفارمیشن انت۔ ہم انفارمیشن و سیلگ ء یک دُژمنے دومی دژمن ء ہر سُر ء پُر، آئی ء جیڑگ ء املانی بارو ء پیسر ء چہ آژنا بوت کنت۔ پیسر ء آژنا بوہگ ء بزانت ایش انت کہ دژمنیں لشکر ء مورل ء نزور بہ کن ء آئی ء اے باور بہ کنائیں کہ تو جنگ ء باج برت نہ کن ء۔

ہم انفارمیشن و ہدیے گیش و دیت داں دُگنیا ء تہ ء تاکت ہمینچو گیش و دان کنت۔ ازرائیل ء ہم انفارمیشن منیجمنٹ ء انفارمیشن کارمرز کنگ ء گوں انچیں ٹیکنالوجی جوڑ کتگ کہ نہ تہنا میانی ایشیا بلکیں سرجمیں دُگنیا اسرائیل ء تاکت ء مَنیت ء آئی ء اینکدریں چُکچینی پے ء پد گُلانی زبان پہ ازرائیل ء بند انت۔ ازرائیل ء جوڑ کتگیں اے آئی سسٹم کہ دژمن ء جنگ ء پیسر شوہاز کن آنت ء جن آنت، اے دُگنیا ء تہ ء ہاس فلسطین ء تہ ء سِلاہ بندیں جہد ء پہ مزین تاوانے۔ ہما اے آئی مشین کہ دژمن ء مچانکی رنگ ء شوہاز کنت ء انچیں داے ء جنت کہ دژمن ہج سرپ نہ بیت کہ آئی ء سر ء چہ کجا ء چوں اُرش کنگ بوہگ ء انت۔ Where's Daddy ء Lavender , Gospel ء ازرائیل ء جوڑ کتگیں اے آئی مشین آنت کہ جنگ ء میان ء دژمن ء شوہاز کنگ ء کار ء کن آنت۔ اے سسٹمانی جوڑ کنگ ء واستہ ڈیٹا یا انفارمیشن ء سکیں مزین کردارے۔ پرچا کہ فلسطین ء اینچو آبادی ء تہ ء ہماس یا دِگے سِلاہ بندیں جہدکارانی شوہاز کنگ ارزانیں کارے نہ انت داں ازرائیل ہم اے آئی سسٹمانی گُمک ء سِلاہ بندیں مردماں شوہاز مہ کنت ء تاوان مہ دنت۔ ہم اے آئی سسٹم پدا ڈرون، کارڈ کاپٹر ء رائیل ء وڑیں سِلاہاں کنیکٹ بنت ء دژمن ء را تاوان دیگ ء گُمک کن آنت۔ ہر اے آئی سسٹم چہ دومی ء جتائیں ڈولے ء کار کنت۔

## لاؤنڈر

ازرائیل ء انٹلیجنس یونٹ 8200 ء برگڈیئر جنرل وای یس 2021 ء وتی کتاب ء تہ ء گالے کارمرز کنت ”ٹارگٹ مشین“۔ فلسطینی رپورٹے ء رد ء اے ہم لائونڈر مشین انت کہ سرجم ء ہم کتاب ء لیکہ ء بنیات ء جوڑ کنگ بوتگ۔ لائونڈر مشین ء تہ ء ڈیٹا سٹ انچو جوڑ بوتگ آنت کہ ہماس ء PIJ جہادی گروپ ء جنگولاں شوہاز کنت ء وت پیسلہ زوریت کہ گُجام جنگول گُجام اُگدہ ء سر ء انت ء چوں اُرش کنگی انت بزاں اگان ٹارگٹ مزن انت مزین سِلاہ کارمرز کنگی انت ء اگان ٹارگٹ کسان انت گڑا کسانیں سِلاہ کارمرز کنگی انت۔ لائونڈر سکیں مزین گچے ء ڈیٹا جَم کنت ء ہم ڈیٹایانی بنیات ء تجزیہ کنت ء پیسلہ زوریت کہ گُجام مردم جنگولے ء گُجام نہ انت۔ اے ڈیٹایانی جَم کنگ ء تہ ء منزیں ٹک کمپنیانی کردے ہم ہست چوشکہ گوگل ء امیزون آنت۔ اے ازرائیل ء را Cloud Service دینت داں کہ گیشاں گیش ڈیٹا یا انفارمیشنانی وسیلگ ء ٹارگٹ ء شوہاز کنگ ء اُرش کنگ ء ارزانی بہ بیت۔ لائونڈر اے آئی سسٹم مردم شوہاز کنت ء kill list ء تہ ء کاریت بزاں لائونڈر ٹارگٹ شوہاز کنوکیں مشینے ء بستار ء کار کنت۔ 7 اکتوبر ء و ہدیے ہماس ازرائیل ء سر ء اُرش کنت ء 1200 ازرائیلی ء کوش ء ہوار 240 آوار جنت داں اے میان ء لائونڈر سسٹم ء کارمرزی گوں گُشادی ء گندگ ء کیت۔ اے میان ء ازرائیل Iron Sword ء نام ء یک آپریشنے کنت۔ 7 اکتوبر ء پیسر لائونڈر ء ٹارگٹ کتگیں مردمانی سر ء شریں داے ء پٹ ء پول بوتگ بلے 7 اکتوبر ء رند ازرائیل ہم گُشیت کہ لائونڈر ء ٹارگٹ کتگیں مردم کساس 90 درسد راست انت۔ اے میان ء لائونڈر ء گچین کتگیں مردم نِشانگ کنگ بنت ء اے میان ء لائونڈر 37000 فلسطینی ٹارگٹ شوہاز کنت۔

## گوسپل

ازرائیل ء گُشگ انت کہ ہماس ء گیشریں جنگول لس مردمانی میان ء ساڑی آنت ء لس مردماں گوں شوکیں نژیکی پے دار آنت۔ گیشتر جنگول وانگجہا، مسیت یا کہ لس مہلوک ء گسانی تہ ء گندگ ء کانت۔ ہماس ء گیشتریں اوتاک سُرنگ آنت ء سُرنگ مسیت یا کہ وانگجہانی چیر ء گوز آنت۔ گوسپل یک انچیں اے آئی مشینے کہ ہماس ء جنگولاں اوتاکانی تہ ء چہ شوہاز کنت،

گوسپل بزاں ہما ماڑی ء دگہ اِسٹرکچرانی سر ء اُرش کنوکیں اے آئی ٹولے۔ چوشکہ ماڑیانی تہ ء لس مردم ہم ساڑی اُنت بلے 7 اکتوبر ء پد ازرائیل وقی Collective Punishment شوربندیانی تہ ء بدلی کاریت ء اے میان ء ہزارانی گچ ء لس مردم کُشگ بیت۔ فلسطینی احوالے ء رد ء چوشکہ فلسطین جنگ آماچیں زمینے داں ہر مردم دومی ء موبائل ء کارمرز کنت، موبائل گار ہم بوت کنت یا کہ چوش بوت کنت کہ موبائل گس ء ایر اُنت ء جنگول دُن ء اُنت۔ اے میان ء کہ اُرش بنت موبائل ہمّاس ء جنگولیں نا بلکیں یک لس مردم ء دَسْت ء اُنت ء اے آئی مشین ہم موبائل ء شوہاز کنان ء اُرش کنت۔

### Where'Daddy

ویئر اِز ڈیدی ہم ازرائیل ء جوڑ کتگیں اے آئی سسٹم کہ ٹارگٹ کنگ کنت۔ ویئر اِز ڈیدی یک ہاسیں مردم ء سر ء اُرش کنگ ء کار ء کنت۔ ایشی ء ٹارگٹ کنگ ہم موبائل ء ڈیٹکٹ کنگ ء چہ بیت۔ اگاں نشان کتگیں مردم ء موبائل دگہ انچیں مردم ء گوں بہ بیت کہ آ ازرائیل ء ٹارگٹ نہ اُنت بلے اُرش انگت بیت پرچا کہ ویئر اِز ڈیدی موبائل ء کمک ء وقی اُرش ء کنت۔ 7 اکتوبر ء بندات ء ازرائیل ء Collateral Damage ء شوربندی چوش اُت کہ یک کسانیں اگدہ داریں جنگولے ء سر ء 20 کولٹرل ڈیمیج اگاں بیت گُڑا اُرش کنگ بیت بلے جنگ ء میان ء کسانیں اگدہ ء جنگولے ء واستہ کولٹرل ڈیمیج داں 15 ء اُتک ہم وڑ ء مزنیں اگدہ ء جنگولے ء واستہ کولٹرل ڈیمیج یک داب ء اُوشتاگ اُت۔ ہمّاس ء مزنیں اگدہ دارے ء واستہ کساس 100 کولٹرل ڈیمیج اگاں بوتگ گُڑا اُرش کنگ بوتگ۔

### اے آئی ء بلوچ راجی جُنز

برگیڈیئر جنرال وائی یس وقی کتاب ء تہ ء یک نبشتہ کارے ء بُنشون ء دیان ء گُشیت کہ The Best way to Predict the Future is to create it - بلے بلوچ ء ہاترا جست اے پش کپیت کہ بلوچ اے آئی اہد ء تہ ء پریڈکٹ ہم کت کنت یا نا؟ پرچا کہ اے آئی سسٹم ء جوڑ کنگ سگیں مزنیں ہبرے، اگاں بلوچ راج ایشی ء پریڈکٹ ہم کت بہ کنت گُڑا ما ہمے سرید ہیں کہ بلوچ راج ء آؤکیں جنگ ء تیاری کتگ۔ سما کپیت کہ بلوچ چاگرد ء اے آئی ء سر ء دور دور ء باوست نیست، اگاں ہست ہم داں آسک مہدود گندگ ء کیت۔ بٹکی کار ہمے بیت کہ ما بلوچ نودربر ء بلوچ ورنایانی تہ ء اے باوست ء ایر کت بہ کنیں کہ اے آئی چے یے ء ورنایاں اے نیمگ ء گیش دلگوش گور کنگ ء سکین ء بہ دیں۔ ایشی ء پد ما اے زانگ ء جہد ء بہ کنیں کہ بلوچ راجی جنزے ء سر ء اے آئی چوں ء چے کساس ء کارمرز بوہگ ء اُنت۔ اگاں کارمرز بوہگ ء گندگ ء نئیت داں ایشی ء بزانت ایش ہم نہ اُنت کہ دیم ء ہم نہ بیت۔ اگاں بلوچ راجی جنزے ہلاپ ء اے آئی کارمرز بہ بیت گُڑا بازیں گچے ء بلوچ جہد نوزر تزیت کنت۔ چوشکہ بلوچ جہد ء گوں بندوکیں اکاؤنٹانی سر ء اے آئی وسیلگ ء سنسرشپ کسانیں گچے ء گندگ کیت، نہ تہنا اے بلکیں پاکستان یک استانے ء بستار ء چہ دُنی کمپنیاں اے آئی سسٹم بہا زرت کنت ء بلوچ جُنزے ہلاپ ء کارمرز ایش کت کنت۔ پہ اے زوتاں چین ء ہوار امریکہ ء نیمگ پاکستان ء گوں روزیگی مَنگ نامگ پہ بلوچ جہد ء نہ وُشیں ہبرے۔ پرچا کہ انچو چین ء پاکستان ء راٹک ٹوک ء دَرس داتگ گُڑا مارا اے ہبر ہم ذہن ء بہ بیت کہ امریکہ ء گور ء ہما مزنیں ٹک کمپنی ہست اُنت کہ بلوچ جنزے نہ تہنا تاوان دات کن اُنت بلکیں دو گام پُشت کِنزینت ہم کن اُنت۔ دومی نیمگ ء مزنیں ٹک کمپنی اُنت کہ آٹپ چار اُنت ء کار کن اُنت۔ مزنیں ٹک کمپنی ہچبر اے نہ جیڑ اُنت کہ اے سسٹم کہ بہا کنگ بوہگ ء اُنت آ پہ بلوچ چکچینی ء کارمرز بنت۔

پاکستان ء 2025 ء جولائی ء ماہ ء کانفرنسیے بیت کانفرنس ء مکسد اے بیت کہ مزنیں سوشل میڈیا کمپنی پاکستان ء نیام ء ناشرکاری ء ہلاس کنگ ء کمک بہ کن اُنت۔ اے کانفرنس ء تہ ء استان ء اندری کارانی وزیر تلال چودری گُشیت کہ سلاہ بندیں گل وُٹساپ ء پہ پروپیگنڈہ ء کارمرز کنگ ء اُنت۔ دیمتر ء کانفرنس ء (بیرسٹر مالک) گُشیت کہ کساس 481 سلاہ بندیں جہد ء بندوکیں سوشل

میڈیا اکاؤنٹ گندگ ء اتکگ ء اے کانفرنس ء ته ء تچک ء سوشل میڈیا کمپنی منت کنگ بنت کہ سوشل میڈیا کمپنی استان ء را ہر اکاؤنٹ ء بارو ء انفارمیشن بہ دینت کہ آسلاہ بندیں جہد ء گوں ہمگرچ انت۔ سوشل میڈیا کمپنیاں گشگ بیت کہ چہ اے آئی ء کارمرز ء ہما اکاؤنٹاں سسپنڈ ء بلاک شیڈو بہ کن انت۔ دگنیا ء ته ء ڈیجیٹل رائیٹس، فریڈم آف ایکسپریشن ء ہوار اے آئی ء در کانودی کارمرز ء سر ء پابندی ہم ہست انت۔ بلے گپ کہ تاکت ء کیت گڑا اے کل ڈالچار کنگ بنت۔ ازرائیل ء فلسطین ء سر ء اے آئی کارمرز ء گوں ہزارانی کچ ء جنین ء زہگ گشتگ انت بلے ازرائیل ء دیم دگنیا ء نہ داشتگ۔ اگاں بلوچ راجی جنز گیش توانگر ء پاکستان نزور کنگی انت گڑا بلوچ راج ء ہاتر ء المی انت کہ اے آئی ء سر ء شریں دزریے بہ داریت داں کہ پاکستان ء ہر سر ء پُر ء آئی ء پندل بے سوب کنگ بہ بنت۔

### شوندات

*The Human machine team “How to create synergy between Human and Artificial intelligence*

*Palestine Digital Right, Genocide and big tech accountability*

*Website: [www.7amleh.org](http://www.7amleh.org)*

*Impacts of AI Technology on Palestinian lives and narratives.*

*Website: [www.7amleh.org](http://www.7amleh.org)*

*Position Paper on European Union AI’s Act and It’s Implications for Palestinian Digital rights.*

*Website: [www.7amleh.org](http://www.7amleh.org)*

*Lavender the Israel’s AI machine*

*‘Lavender’: The AI machine directing Israel’s bombing spree in Gaza*

*Artificial Intelligence Deception of Conflict: Israel-Palestinian*

*Digital literature*

*<https://youtu.be/lfOgm1lcBd0?feature=shared>*

*<https://youtu.be/fGspSmabEa4?feature=shared>*

*<https://youtu.be/eEvIQrRTmns?feature=shared>*

*ChatGPT*